

Messa festiva cun cant da Mozart en claustra da Glion

In punct culminont dalla festività 800 onns Uorden dominican

DA PAUL DUFF / ANR

■ **Dumengia, ils 11 da settember suonda in ulteriur scalem festiv el ciclus dil giubileum dad 800 onns Uorden dominican. La messa festiva allas 11.00 vegn enramada dil cant cun accumpignament orchestral. Cun il dirigent Mario Schwarz han sur 100 cantaduras e cantadurs ed igl orchester Collegium Musicum Ostschweiz exercitau sur treis dis la Messa d'encorunaziun da W. A. Mozart.** «Per nus dalla claustra dallas dominicanas a Glion ei la sontga Messa dils 11 da settember in punct final dallas festivitàs da giubileum da nies uorden. La fiasta da finiziun internaziunala ha liug dils 16 tochen ils 20 da schaner 2017 a Ruma.» Aschia orientescha sora *Ingrid Grave* la pressa sco prevista sin quei di festiv a Glion. Ord la claustra sursilvana ei vegniu lantschau per igl ault giubileum il teater ambulont cul tetel provocont «Claustra da regalar». Suenter la turnea en Svizra vegn quel era menaus si alla festività finala a Ruma.

Ovra monumental cun chor, orchester e vuschs solisticas

L'idea dad embellir la fiasta finala cun cant sacral durent la messa ei vegnida dallas soras ensemen cul dirigent *Mario Schwarz*. Il musicist da Sogn Gagl cun fermas ragischs romontschas ha clamau cantaduras e cantadurs en ina



Il dirigent Mario Schwarz, cheu sco dirigent digl orchester Südwestdeutsche Philharmonie, diregia la Messa d'encorunaziun da Mozart a Glion.

FOTO P. DUFF

acziun derasada ell'entira Svizra. Silmeins 50 ha el sperau da dumignar ensemen. Ussa stattan el e l'entir'organiziun avon in chor da sur 110 cantaduras e cantadurs. Plirs da quels vegnan ord la regiun sursilvana ed auters vegnan a Glion ord regiuns allontanadas. Tala situaziun captivonta ei per Schwarz enconuschenta e sa buca stermentar el. Sulettamein il plaz en baselgia per tons interprets, per orchester e solists fa ad el in tec fastedis. Per sligiar quei problem vegnan las soras a dar maun ed anflar ina buna sligiazion. Aschia stat nuotzun en via per embellir cun biala musica monumental l'impurtonta fiasta digl Uorden dominican.

La messa per chor, orchester e vuschs solisticas KV 317 da W. A. Mozart ei cumponida igl onn 1779. Mozart ei vegnius engaschus sco organist dalla cuort salzburghesa ed ha scret l'ovra che ha pli tard survegniu la nominaziun «Messa d'encorunaziun» per la fiasta da Pastgas da quei onn. L'ovra classica ei enconuschenta per sia tempru festiva da gronda dimensiun. La sfida per in bien garteg ei dada ed ils interprets semettan plein engaschi vidlunder.

Il musicist Schwarz ei naschius a Trun. Dapi biars onns ei sia dimora Sogn Gagl e siu areal d'engaschament ella regiun entuorn il Lag Bodan. Sia carezia per la cultura grischuna ha menau ad ina amicabile relaziun persunala cul cumponist indigen Gion Antoni

Derungs. Schwarz ha dirigu biars ovras dil cumponist romontsch. Denter quellas operas e sinfonias e suenter la mort dil cumponist sededichescha Schwarz vinavon cun la publicaziun dalla musica da Derungs. El ei confundatur dalla Fundaziun G. A. Derungs e publichescha cuntinuadamein sias ovras sin purtaders da tun. Quei engaschament ha purtau ad el reconuschientscha ed el ha retschert igl onn 2004 distincziun dil cantun Grischun. Per siu engaschament sur il territori dils cunfins dil Lag Bodan ha el era survegniu il premi da distincziun dil cantun Sogn Gagl.

Las soras da Glion ein dapi 150 onns en nossa regiun. Ellas selegnan da s'entupar cun visetas. «L'appreziun da nies dacasa, nossa atmosfera claustrala fa bein a nus. Per nus ei quei in encuraschament da mantener quella aschi ditg sco pusseivel. Nus essan visadas vi sin gidonters che sustegnan nus en nossa lavur ed incarica.» Aschia beneventa sora Ingrid ils hosps en lur casa. Ella spera ch'ils presents sentien la carezia ed il respect e las soras selegnan da semetter ellas retschas dil chor e cantar da cuminonza il laud a Diu.

Ils 11 da settember allas 11.00: Messa festiva legida da pader dominican *Frantisek Pistrak* e priedi da sora *Eugenia Jörger*. Suenter il survetsch divin vegn surviu in aperitiv als presents.